

四庫全書

集部

欽定四庫全書

文敏集卷十九

明 楊榮 撰

墓碑

贈驃騎將軍右軍都督府都督僉事劉公墓碑
皇明肇興而四方豪傑之士莫不駿奔景從以乘風雲
之會故智者效謀勇者效力皆足以著偉績於當時垂
芳聲於不朽誠千載一時之遇也于時若開封密縣劉
公諱先字先祖者蓋亦一人焉公自少負大志有膽畧

既長忠義慷慨才識過人適元末鼎沸之秋即募民兵以圖匡濟義旗所向罔不克捷以功累陞平章政事鄭國公既而元氏國亡公知天命有在洪武初遂率所部來歸從鄂國常公信國湯公收河北諸郡洎西戡晉絳以敗王保之兵復從丞相魏國徐公克陝西秦鳳環慶諸州歲己酉由平涼入覲承恩授驍騎前衛指揮僉事明年復從征迤北調驍騎左衛甲寅調茶陵衛加授廣威將軍辛酉調征雲南所至身先士卒大小五十餘戰

俘獲斬馘甚衆雲南平置烏撒衛指揮使司陞公為指
揮同知以鎮之時治所新設莅事精勤撫治有方蠻獠
信服未幾賜誥進階懷遠將軍并得推恩贈父證如公
職母范氏配王氏俱為淑人戊辰八月乙巳以疾卒享
年六十有三將歸葬其鄉而道遠弗遂乃浮殯于淺土
者十年至戊寅某月某日其子廣始克奉柩葬于張固
堡壇頭村之原子男二長即廣既襲公職復能繼承先
緒屢立戰功積官至驃騎將軍右軍都督府都督僉事

宣德三年戊申復承朝命總戎甘肅領符節佩平羌將軍印控制西北諸番大著威望明年己酉授誥贈公及先代皆如廣職公之母洎配皆進夫人繼室張氏封夫人次日德女二人長適甘州右衛指揮于暈次適西寧衛千戶鮑玉孫男七曰傑曰偃曰信曰佑曰偉曰倌曰儼嗚呼元運既終而中外跋扈之臣外託興復內懷僭叛因而紛擾者不可勝數其中能知幾識變歸順真主以共成事功者幾何人哉若公乘時自奮既弗克遂其

匡濟之志乃能識達天命際會風雲樹功業于生前福
子孫于身後可不謂之豪傑之士哉予叨祿于朝職專
史筆忠臣良將固所樂書既為之序其槩而又系以銘

曰

天啓皇明元運告終羣豪紛紛莫知適從惟公賢達灼
知天命效義來歸志堅氣勁勇冠萬夫為國虎臣北伐
南征奮不顧身勲業既隆位陟三品沒四十年聲威凜
凜篤生英嗣實克紹承屢從車駕掃蕩朔庭受命總戎

秉符仗節覃布德音邊人以悅惟公才猷弗獲盡施敷
佑于後天報未涯錫命頒恩榮膺嘉獎龍章絢爛光貴
泉壤繩繩繼繼嗣續繁昌將業罔替令聞益彰維斯丘
墓秋霜春露勒茲貞珉永世無斁

楊氏先塋之碑

維我大父達卿公其先系出關西唐末有官于閩者因
家浦城後子孫益盛散居建陽崇安崇安之派有萬大
府君者嘗遇異人示以葬地由是始遷甌寧之楊墩楊

墩之後有三十府君者復遷建安之龍津公其裔也祖
諱文德父諱伯遜皆隱德弗耀母黃氏公之生手有駢
指平生敦厚質實不事浮靡公平正大無所阿徇事親
敬長而孝弟之行篤待人接物而忠厚之意隆宗黨有
喪不能舉者為殯葬之孤貧子女無所依者為收養之
重先祖之祀而躬致其誠命諸子攻醫以濟人之疾歲
凶則推衣食以賑饑寒牛疫則出貲廣市以助耕者率
族人以惇睦化奸盜為善良嘗募人植木於山戒子孫

勿鬻惟施為學舍寺觀舟梁及與人養生送死之用每歲首則設酒食會鄉人戒毋燬山林恐傷昆虫草木之生有截流毒魚探巢取雛者皆予之錢穀深勸其勿為有聞爭忿鬪貪妬狼戾者悉諭以福禍皆樂然感悔于時左丞阮公受命守閩聞公名禮公為之師故政無苛虐而人賴以安非惟公之行誼著於鄉而仁愛及乎物者如此凡公所以見於日用云為之間者一出於天性之自然未嘗有纖毫矯激而為之也以是人無少長貴

賤咸知公為長者至于今仰慕之弗忘娶謝氏繼阮氏
俱有賢德子男五女三公以洪武戊午十一月二十二
日終享年七十有四以乙丑十一月二十六日葬建寧
城東白鶴山之麓公卒時榮甫八歲思惟公之訓誨諄
切拳拳服膺而弗忘及今忝以文學受知聖天子歷官
詞林春坊遂兼拜文淵閣大學士之命恩榮寵眷二十
餘年矣距公之歿又幾五十年遺澤既敷而胤嗣益蕃
音容雖遐而訓言在耳公之行實其詳已載於銘誌茲

不具述第叙其槩以見公之所以錫佑于後者如此用
勒諸墓石俾來者有所徵焉敬為之銘曰

維我楊氏闕西肇基繼官于閩益衍其支轉徙龍津粵
由顯祖積行累仁暨于大父大父之生孝友是敦捐貲
發粟急難周貧知無不為惟義所在雖物之微弗忍戕
害病者予醫死者為葬奸盜革心惠及鄉黨閩有守帥
禮公為師厥政弗苛民所庇依先塋之山募植材木用
以廣施弗私弗鬻公雖云亡遺愛在茲矧我後裔寧不

懷思閩山峩峩惟公之德閩海汪汪惟公之澤爰作銘
詩以示後昆慶源所鍾永世其傳

故翰林侍讀學士朝列大夫張公墓碑

故翰林侍讀學士張公志道閩之先輩君子也其德義
學識為當時尊尚予恒以生晚不及親炙為恨公之孫
隆以前刑部主事劉子欽所述行狀來請銘予讀之慨
嘆先輩之不可及尚敢銘公墓乎然以隆之請堅確弗
可得而辭也按狀公諱以寧志道其字也元贈禮部尚

書諱留孫之孫中奉大夫福建江西行省叅知政事諱一清之子其先有光祿大夫諱睦者自光之固始從王審知入閩始居古田之梅溪至公曾大父世延再遷邑之雲津坊一清先娶廖氏生三子願興野俱幼而廖卒繼娶陳氏有賢德訓育廖所生如已出陳既有娠一夕夢小兒擎荷葉向月而拜覺而公生賦質清粹神采煜煜襁褓中即嗜讀誦甫六歲日記千言嘗與羣兒遊寺中僧人難之以對公隨口酬應意甚超卓聞者歎羨八

歲時人訟其伯父逮于獄公忿不能平詣邑伸理令異
其言有條序命賦琴堂詩立就且出語新奇伯父由是
得釋年十五承父命往寧德受學于韓古遺越五年方
歸學業大進鄉之學者莫不推許之登元泰定丁卯進
士第初任黃岩州判官不踰年以計擒捕海寇殆盡民
賴以安繼陞真州六合縣尹有惠政及民以丁內艱去
官服闋將上京師為兵所阻教授淮南者十年王鈍石
光霽皆其門人也後復徵至國子助教累官至翰林侍

講學士中奉大夫知制誥兼修國史祖考皆贈官祖母
賴氏母廖氏陳氏妻宋氏皆清河郡夫人既入國朝拜
翰林侍讀學士朝列大夫知制誥兼修國史每承顧問
多所裨益賜誥褒諭恩賚特厚馬洪武己酉夏六月奉
命賚詔印使安南封其國王未至而王卒國人請授其
世子公不聽遣人請命于朝且教其世子服三年喪并
令其國人效中國行頓首稽首禮朝廷嘉之賜以勅書
比之陸賈馬援并御製詩八篇以獎諭之未幾得疾卒

實庚戌五月四日也公生於元大德辛丑四月十有五
日至是春秋七十其在安南八閱月著書不少倦臨終
自為挽詩意豁然也訃聞勅禮部遣官歸其柩所過有
司設祭仍給在任三歲祿以贍其家以某年某月某日
葬邑之極樂山初娶太原宋氏生子四人烜燧燁煜繼
娶大名宋氏生子炬烜燧燁早世煜以明經舉湖廣蒲
圻知縣炬以茂才薦任江西新淦知縣官至刑部員外
郎並著政績孫男七垣圻埴坦埴墳壇埴任南雄保昌

儒學訓導更名隆煜之子也公所著文有翠屏藁淮南
藁南歸紀行安南紀行集春秋春王正月考故翰林學
士金華宋景濂瀏陽劉三吾皆稱公之文章瑰傑迥出
流輩而非後學所及其尊敬仰慕于公者甚至予以末
學又安能稱頌公之遺德哉因不揆蕪陋而為之銘銘

曰

世德相傳厥為名族固始徙閩肇于光祿積善流慶林
毓文儒藹如喬松溫若美瑜富有才華早登科第啟歷

中外英聲歟起際我皇明奉職詞林用弘裨益恩眷彌
深使節煌煌遠臨交趾夷俗丕變龍顏以喜寵命方降
訃音遠來天語興嗟夫茲良材爰歸其柩復卹厥家生
榮死哀綽有光華墓門有碑以昭厥德維公子孫永世
承式

故奉直大夫兵部職方員外郎致仕周君墓碑
正統三年夏四月五日兵部職方員外郎致仕周君岐
鳳以疾卒於家訃聞其子翰林侍讀叙泣而告曰叙於

先君子生不得侍左右而致旦夕養疾不得躬侍湯藥
歿不得受遺訓而送終不孝之罪大矣先生知先君子
為深而辱教於叙者久幸哀而賜之銘俾得樹碑墓道
用昭先德於永久庶盡人子之萬一予重其意不容以
老倦辭為之述曰周氏吉之大族其居吉水泥田者世
以儒顯宋季有諱應龍號礪洲者舉紹定進士為時名
儒其子京孫直寶謨閣以言詆賈似道去官直閣之從
子厚號亦山者君之曾祖也元以明經領鄉貢薦入館

閣預修三史上言以宋為正統不合而去終鰲溪貞文
書院山長諱聞孫者君之祖也贈奉直大夫職方員外
郎諱觀號彬彬者君之考也君諱鳴字岐鳳性質穎敏
而嗜學才識高邁襟度弘達言論侃侃如也洪武甲戌
以經明行修薦為桐城縣學訓導既至嚴立教條勸課
啟迪有方諸生自是樂學出而決科取士者相繼後以
外艱去服闋擢即墨主簿優於為政藩司因遣同御史
僉事往登州讞強盜獄盜七十三人而稱屈者四十五

人御史欲不與辯君察其情果濫乃具為御史言四十
五人者悉得不死會兵興所司命縣民出鐵資軍需君
奏鐵非所產請出府庫積鐵以抵用庶蘇民力又命民
輸豆赴軍而準其歲賦已而復征其米俾以鈔償豆君
復奏豆米俱徵失信於民也請從初令且連奏便民十
餘事朝廷皆納其言民甚德之永樂甲申徵授國子學
正明年太宗皇帝幸太學預筵宴襲衣之賜未幾擢漢
府紀善初甚見禮待時王府私有壯士三千非兵部籍

發者及所為多不法君輒具諫王雖面從而心忌之王嘗開寶賢堂以延問羣臣實欲招匪人為異謀也君心知之因作堂箴寓規諷之意王益忌之會大駕北巡王擁重兵出入君言王宜抑兵威守藩臣禮遂激王怒翌日密令衛士詬侮君及君以白王令質於儀衛司已而獨送于朝欲構諸重獄時仁宗皇帝監國察知君以諫忤王無他咎遂降長洲儒學教諭一以教於桐城者教其徒三為閩浙鄉試考官所取士多得人秩滿赴行在

陞國子博士至南京召見于文華殿慰諭甚至且期以
大用尋丁繼母憂服除用薦陞今官時方清理戎籍而
職方事尤劇君至剖析無滯僚寀服其能三載考最賜
誥命階奉直大夫贈考妣如制宣德乙卯乞致仕以歸
至是終於正寢歷年七十有五娶彭氏贈宜人繼室王
氏封宜人俱有懿德子男三人長曰勉次即叙以永樂
戊戌進士入翰林院累陞侍讀又次曰廣女二人前兵
科給事中金昭伯廬州儒學訓導彭塤其婿也孫男七

蒙渙復巽同伯咸恒女三人曾孫男二人女二人叙將
歸卜是年某月某日合葬於里之錦峯山宜人王氏之
兆嗚呼君為人孝友嫻睦急於濟人甫十歲母李氏宜
人卒哀毀不自勝見者稱嘆筮仕桐城即迎父就養及
卒奉柩歸至小孤舟將為風覆君仰天而號風隨以定
教育二弟冠婚盡禮合三從之親為一爨人近千指服
用皆有常度著家範十數條以示子孫族子弟性敏者
悉令肄經學取祿仕其有致官不能歸葬者必為經理

而歸之嘗遇清江艾時春之官寧海道為寇所傷且掠其貲君求藥愈之而復贖之其尚義類如此少從季父子霖族兄仲容受書經旁及他經傳故學有原委為文浩瀚沈實無浮薄之疵晚號退齋有退齋藁六十卷藏于家別著尚書通春秋纂要授學者惟君以衣纓之裔文章事業既足以克紹前美而詩書禮義之澤又足裕後人是可謂賢也已銘曰

吉多右族世繁且昌傳數百年弗墜而彰文江之濱遠

矣周氏慶澤之流詩書禮義卓卓礪洲學正而淳抑有
賢嗣為宋直臣子孫碩蕃世濟厥美猗歟職方譽望斯
偉教嚴道尊學者儀刑審審其言藩國用懲言雖弗行
我則無愧仁廟之知謂將重寄作屬夏官弗究嘉猷年
既耆邁式遄歸休以逸厥躬以樂厥志胡未百齡溘然
遐逝錦峯之山有高其墳銘昭不朽君其永存

追封西寧侯宋公墓碑

自昔帝王之興必有英賢為之輔翼然後戡定禍亂以

成大業我太祖高皇帝膺受天命龍興濛泗於是虎賁
鷹揚之士乘時而出雲合景從不數年間芟夷羣雄盪
平宇內遂正大統何其盛哉方其時鳳陽之定遠宋公
隱約田里抱負才器慨然欲自見於當世適元政不綱
四方騷動因竊歎曰國事如此將必有真主受命而興
乎及聞太祖舉兵遠邇咸附即偕其子國興及晟上謁
時得叅預謀議是歲壬辰隨軍克濠州復征賈魯敗之
即授管軍萬戶甲午從克五河泗洲盱眙等處并子國

興俱授總管乙未又從征克復和州渡江下采石太平
遂攻溧陽丙申從攻蠻子海牙水寨破陳也先營克復
建康授廣德元帥丁酉克宣州遂留守禦改授天寧奕
元帥以年老還建康晟累從征伐有功先以凡國興歿
于王事命襲兄職己亥始得代公為元帥公既以耄疾
閒居每奮曰吾父子幸際聖明以開萬世太平之業惜
吾老不能效尺寸然猶有望於吾兒竭盡忠盡耳厥後
晟積功累陞至龍虎將軍山西大同都指揮使洪武乙

丑公以疾沒上命治墳塋於京都聚寶門外雷家庄葬
焉給賜其家甚厚歲丙寅晟為右軍都督僉事遂得推
恩以其職封公階驃騎將軍晟既調中軍累充總兵征
伐迤西及遼東五開諸處臨機決勝茂著勲績太宗皇
帝入承大統晟朝京師陞後軍都督府左都督是年選
晟第四子琥為駙馬都尉尚安成公主繼而兵部臣言
晟第二子瑄先任府軍右衛指揮使而戰死於靈璧為
請上特命晟之第六子瑛襲瑄職永樂甲申瑛復選為

駙馬都尉尚咸寧公主晟既佩平羌將軍印總兵甘肅
號令嚴整奠安一方而西北部落相率降附由是進封
西寧侯食祿一千一百石丁亥七月晟以疾沒官歸其
喪葬南京之祖塋以琥襲爵甲辰仁宗皇帝即位琥以
事削奪洪熙元年春正月復命駙馬都尉瑛襲父侯爵
并署宗人府事給以原祿子孫世襲公諱朝用今上即
位改元宣德始加贈公及公之考壹皆為西寧侯妣朱
氏配陳氏皆為西寧侯夫人男七人長曰國用早世次

國興以功授總管歿於王事次國祥次晟晟累官至後
軍都督府左都督進封西寧侯次昱任山西布政使次
曄次旻女若干人孫男七茂瑄瑜琥玘瑛瑾孫女若干
人曾孫男若干人曰傑任指揮使曰偉任指揮同知曰
俊任指揮僉事曰儼曰佑俱任正千戶曾孫女若干人
瑛閒嘗告予曰惟瑛菲薄叨承祖父遺烈得以聯姻戚
里享有封爵斯實先德敷佑所致其奚敢忘然夙夜思
惟吾祖當草昧之初遭遇太祖高皇帝興王之運與吾

父兩世戮力屢從征伐茂著勲庸而吾祖不幸年邁負
疾家居厥功弗顯瑛仰荷餘蔭叨有厚祿雖蒙國家恩
榮盛典寵賁九京而墓碑無文何以示後幸賜一言以
褒拂之非惟足以彰朝廷之厚恩尤足以昭先德於無
窮也予弗獲辭因為序次其槩而系之以銘曰

昔在太祖受命而興天戈所嚮莫之敢嬰賢豪景從雲
龍風虎經營四方罔不順附維時宋公默識事機發迹
田野真主是依豈惟公能公又有子竭誠效忠折衝禦

侮群雄剪除公亦年耄負疾家居辭榮履道子既克肖
懋建厥功諸孫實賢爵位益崇九京茫茫不可復作龍
光昭回以慰冥漠雷莊盤盤有威斯阡銘以昭之永世
其傳

故明威將軍建寧右衛指揮僉事贈昭勇將軍
福建行都司都指揮僉事徐公墓碑

洪惟聖明誕膺天命一時豪傑雄勇之士雲合景從相
與經營四方遂成大業若故明威將軍建寧右衛指揮

僉事徐公諱義者和州人也裔出栢翳歷世以來代有
顯官至元之李公之父曰壽才畧過人輕財重義賑濟
窮乏有若渴饑及兵興遠邇騷動公父子俱處兵間初
從平章額森特穆爾後因靖海侯吳公來歸相率渡江
克太平定建康授領軍萬戶嘗以力戰創甚命公代之
撫其背曰繼吾志者汝也蓋公為子弟時嘗慨然有大
志不營治產業剛毅正直膂力過人好讀孫吳書意有
所合則撫卷而喜平居以騎射擊劍為樂至是代父戍

守江陰施設布置人咸異之吳元年從征偽吳張士誠
每戰能躍馬揮刀作虎吼突入其陣衆皆披靡決戰之
際雖矢石交集血流至踝弗顧也卒成其功繼克明州
福城延平還定昌國拔蘭秀二山洪武元年授昭信校
尉江陰衛百戶三年陞武畧將軍汝寧衛副千戶從信
國公克瞿塘進取西蜀五年復從岐陽王北征沙漠公
奮勇深入擒獲甚衆然不妄殺掠所至之處人多歸之
無不愛戴之若父母焉又能撫恤士卒與同甘苦故得

其死力而功能益著十一年授明威將軍建寧右衛指揮僉事號令整肅倫禦有方繕修力役勞逸適均人心悅服二十一年春得疾且劇即却藥曰死生有命豈醫藥所能療耶顧其子信曰汝曹當忠以事上正以率下勇以禦敵仁以撫衆則臣子之道盡矣言訖而逝其生已卯終於戊辰享年五十明年信弟侃奉柩祔葬祖妣之塋在甌寧城北之烟源山也配李氏有賢行年四十二而歿始封恭人追贈淑人子男三人長即信次侃次

儀女一人早世孫男六人禎禔禧祉禕祺信既承父職
歲壬午率兵至汶上從王師入京陞懷遠將軍建寧右
衛指揮同知永樂丙戌調征交趾既還重沐恩賚以旌
其功歲乙未來朝特陞福建行都司都指揮僉事授昭
勇將軍賜以金幣給以驛傳仍推恩其先世考妣故公
有昭勇之贈距今十載信慨念公之墓石無文恐德美
不彰以予家建寧知公為詳因以狀請銘予不得辭遂
叙次其始終而為之銘曰

天啓聖明眷命實隆龍飛渡江豪傑雲從桓桓徐公父
作子述決機制勝有紀有律奮勇敢愾實為驍雄萬衆
一呼孰嬰其鋒閩淞既平旋定西蜀漠北以清降附相
屬奏凱論功授官建寧莅職恪恭號令嚴明知命之年
疾乃却藥孰不有死公死無怍後嗣克賢益振武功寵
命薦加顯于褒封煙原盤盤土厚山環勒銘貞石永世
弗刊

先考少傅公墓碑

嗚呼我先考少傅公克承世德啓佑後人而小子榮猥
以科第發身脩員翰林歷事三聖恩遇日隆褒封之典
及先世者咸得如秩先考永樂十年贈奉議大夫右春
坊右庶子洪熙元年再贈資善大夫太子少傅兼謹身
殿大學士宣德五年加贈榮祿大夫少傅工部尚書大
學士如舊嗚呼國家恩禮極其盛矣豈小子榮能致之
是蓋先德不亡者存焉榮謹叙次勒之貞石用昭示永久
先考諱伯成字士美漢太尉震之後有官于閩者子孫

家焉遂為閩人遠祖萬大府君之季子三十公居甌寧
族益盛人因稱所居之地曰楊墩子孫復自楊墩徙建
安曾祖文德祖伯遜俱隱終考達卿積善樂施與家日
以大先考承積累之厚益圖宏遠自少端謹言動若老
成人孝於父母生事葬祭無爽於禮處兄弟極友愛兄
伯祥蚤逝撫其子女七人咸底成立睦親姻賙貧困意
豁如也嘗曰裕後莫如詩書之教庠序英才所出乃遣
榮從邑博士學而諭之曰立身顯親此其階也惟勤勵

庶克有成復念鄉人子弟貧無所授教乃開義學招師
儒聚而教之與人交始終以誠人有過必規正之故所與
游者多善人邑大夫屢欲薦之懇以親老辭後復舉孝
廉至京師以滌官于朝賜歸喜謂滌曰子素無仕進意
茲得遂願念聖恩無以報在汝勉之既歸益自晦養雖
藩臬官長按臨郡邑亦不接見所居傍近有雲際山作
草堂其中布衣韋帶日同親友濯清泉翳茂林賦詩飲
酒休休如也復構樓數楹積書其上曰吾以此遺子孫

使無忘世訓常馳書戒榮惟以忠孝大節未嘗一語及家
事榮嘗受上尊之賜寓歸為壽至日招親姻會享後三日
復召所親酌之曰人生如白駒過隙求無愧怍斯可也衆異
其言是夕沐浴具衣冠危坐命取鄉人債券焚之語家人毋
厚葬毋泥陰陽家人環侍而泣復諭之曰母泣死生常理
言訖而卒實永樂六年四月丙午也享年五十有六是年
九月癸酉葬杭隴山之原先母夫人劉氏諱順甌寧世家
自幼知書貞靜柔懿相先考起家婦德母儀為閨門矜式

享年五十有五先考歿後六月甲午卒又二月甲申祔葬焉
初贈宜人再贈夫人加贈一品夫人子男五人長榮次富次
惠信貞女四人吳壽劉溥雷鐔童衡其壻也孫男十有二人
女十人曾孫男六人嗚呼我先考積德累善身不食其報而
小子榮叨享厚祿曾不終養仰賴聖明薦隆恩典用昭先
德足以表著於世先庇我後人嗚呼為德之報良有徵哉

墓表

故嘉議大夫禮部侍郎蔣君良夫墓表

士之生世有所抱負莫不欲見於有為然恒有弗克遂
其所欲者及其薦躋融顯方將效用於當時則壽年弗
逮齋志而歿可勝悼哉予友蔣君良夫實其人焉良夫
諱驥世居杭之錢塘自少穎悟知讀書年十二選為郡
庠生從師受春秋經貫通三傳得筆削之旨弱冠領江
浙鄉薦登洪武庚辰進士第釋褐擢官行人嘗奉命出
使郡國皇華之光照暎道路蓋君姿貌清俊而神氣秀
朗所至人皆仰其風采焉永樂初用薦與修太祖高皇

帝實錄既成賜白金綵幣襲衣陞翰林院檢討自是日居秘閣得盡閱古今天下之書而學識益進聲譽益隆未幾復與修永樂大典承命為副總裁書成忽為人所連逮繫獄十有餘年君處之怡然未嘗有纖芥不足之色人皆以為難能謂非行素之士不至此也洪熙改元蒙恩得釋陞左春坊左司直郎事今上於儲宮小心謹慎克盡厥職既受勅命階承務郎且得推恩封父均美如其官母妻皆安人今上即位宮臣咸被恩遷秩遂陞

翰林院侍講與修太宗仁宗二聖實錄既成有白金文綺襲衣之賜進翰林侍講學士不兩月天官奏六部闕貳副之職上特命廷臣各舉所知於是得八人焉而良夫其一也遂拜禮部右侍郎命下之日士林稱慶皆以為儒者之榮遇莫此為盛矣君莅事曾未兼旬而遽以疾卒宣德庚戌七月丙寅也嗚呼惜哉翌旦尚書胡公以訃聞皇上為之嗟悼親為文遣官諭祭命給驛載其柩以歸詔有司為治墳塋恩德之厚葭以加矣其孤琳

痛其父之奄棄懼先德之或泯乃屬監察御史同郡姚
起東為述行實來請予言將鐫石樹於墓道以垂不朽
子與君同年又同官翰林弗可以辭按狀君之高祖諱
某曾祖諱某祖諱秀實皆隱德弗耀父均美篤善好義
以長厚稱於鄉母姚氏端重有福氣善持家配金氏有
淑德賢於內助子四人長曰瑠次琳次瑛次某女三人
長淑清適王衡次淑明適馮昱一在室孫男四人惟君
才性通敏曾次坦夷居家庭則克盡孝友處姻族則敦

尚和睦待賓朋久而能敬馭僕隸嚴而有恩至於莅官
在職公勤廉慎溫雅和平操履堅確信義兼孚是以人
無怨惡時稱忠厚焉雖然君履歷之詳已具于少傳西
昌楊公藏墓之銘茲不重著故特舉其大槩與其有所
蘊蓄而未及施為可深惜者俾刻于墓石庶幾後之人
得有所考見焉

故宜人張母陳氏墓表

宗人府經歷張珂母宜人陳氏以宣德三年十月十七

日卒於家明年春正月訃始至北京珂哭踊幾絕已乃匍匐奉狀謁予請文以表宜人之墓拜且泣曰珂不肖罪孽深重禍延吾母奄忽棄養抱痛終天曷其有窮今將歸卜以是年某月某日奉柩葬於某山之原然吾母平昔德善惟先生以姻戚素所知者幸賜一言刻之墓石以垂不朽庶少紓不孝之罪也予弗獲辭按狀宜人諱妙善某之女也世居建安之璜溪生元至正丁酉六月癸丑賦性溫淑沉靜寡言而尤習於女事甫笄為擇

所宜嫁得里中張伯銘遂以配焉既歸事舅姑以孝處宗族以和相其夫以敬時族姻里鄰咸私相謂曰張氏可謂得賢婦矣舅姑亦喜曰興吾家者必此婦也舅姑既沒哀痛號泣殯歛葬祭皆克盡禮歲時追慕哀痛有加焉伯銘嘗以賦役居外宜人綜覈家務皆有條理至於祖宗之祀姻戚之禮賓客之奉無不適宜而敬老撫幼賑貧卹匱又其餘事也鄉里有假貸者隨所有輒應之其償與否不較也治家有禮法御諸婦役婢僕皆有

恩意尤篤於教子以珂性識聰敏即勸伯銘遣入邑庠受經遂登永樂丙戌進士第歷官行人至贛州府知府以轉今官珂守贛時即迎以就養既至郡民莫不瞻奉尊敬而宜人深自謙抑服食儉素畧無所增每聞公堂有鞭扑聲輒令人覘之潛加戒止俟珂公退即訓飭之曰為民父母宜以寬恕存心若少加鞭箠傷其體膚豈為民父母之道哉珂嘗以俸祿之入製輕暖市肥鮮以奉宜人即鬱鬱不樂曰吾之意豈在口體哉珂自是隨

豐儉不敢違聞者莫不稱歎既而歸鄉言動無異平時而執禮逾謹躬服勞勤彌老弗倦至疾篤囑伯銘曰珂至宜訓以竭誠報國無以我為念且丁寧諸子婦以奉法守禮為先勿貽外人笑也遂瞑目而逝享年七十有二子三人長即珂次善早夭次璉女二人長適魏德次適魏珅孫男六人曰吉曰壽曰慶曰安曰寧曰祥孫女五人長適予次子讓次適同里陳其餘在室曾孫二長文顯次文達嗚呼女婦之德儀刑閨門之間固弗得大

著於外然孝子欲顯其親則又不能不託之於言以垂不朽况宜人於婦德母儀兼盡其美而又樂善好義以壽考終皆非人之所能及而予於宜人之淑德賢範又耳熟而目擊者烏得不表而出之遂為叙次其槩俾刻諸墓碣以昭示于悠久焉

贈奉議大夫兵部郎中田汝楫墓表

為善者必獲福理之自然也然世有積善行義而不膺爵命隱約以終至其沒也乃得蒙褒贈之典以為身後

之榮者茲豈非德義所施而有以獲報也乎今兵部武庫司郎中田忠之父汝楫卒之後十有九年為洪熙改元之初始得以忠推恩褒贈如其職配王氏為宜人宣德己酉之秋忠以公務來北京乃述其父行實來請予文以表諸墓予與忠交契甚厚素知汝楫之為人故弗獲辭按狀汝楫字仕濟姓田氏其先壽州之下蔡人元之世有諱某者為總轄官仕濟之高祖懋為淮西廉訪司副使曾祖某仕提舉祖諱盛國朝授太平宣城同知

改知州永新後調福建行都司斷事廉謹自持其後以老致仕卒於建寧葬城南之覆船山仕濟因守父墓乃置田築舍家於城中遂為建寧人仕濟資稟醇厚聰敏過人事親克盡孝敬處鄉鄰姻戚克著信義言不妄發發必中理人不濫交交必君子家庭之間自老及幼翕然以和至於應官府處家事皆有條序纖毫罔失平居喜讀書而尤攻性理之學訓誨諸子必諄諄仁義之言外甥午初生而母死無鞠育者即於乳抱中挈歸養之

愛如已子竟克成立生物之微必愛惜之每見地上行
蟻輒迂跡以避惟恐踐之以傷其生家畜雞豚非祀先
奉親待賓不忍輕殺深喜建之山水秀麗時時出遊必
吟詠笑傲終日盡醉而歸人皆稱為寬厚長者卒之歲
實永樂丁亥三月己巳也距其生元至正丙戌三月己
亥享年六十有二祔葬覆船山先塋之次配即王氏有
淑行江西吉安人子男三長即忠次寧次福忠由邑庠
生登永樂甲申進士第選入翰林為庶吉士未幾擢兵

部主事考滿陞今職焯有聲譽寧福及三女皆早逝孫男三曰貞曰恭曰敬貞克務學孫女三曰善曰惠曰喜嗚呼仕濟抱負才器足以有為然卒以隱終誠可謂純篤修潔之君子矣復何憾哉况復有賢嗣若忠者位躋顯融荷蒙恩命褒其先世光被幽壤則仕濟雖死猶不死也烏得不表而出之以示後世庶幾為善者有所勸焉

文敏集卷十九

欽定四庫全書

集部

文敏集卷二十一

詳校官編修臣 裴謙

中書臣 劉源溥覆勘

總校官中書臣 朱鈐

校對官學正臣 常循

謄錄監生臣 舒免岐

欽定四庫全書

文敏集卷二十

明 楊榮 撰

墓表

國子監丞張緝熙墓表

永樂癸卯五月二十五日國子監丞張顯緝熙卒於官
予既往哭而又為文以祭之今其喪歸葬於故鄉某山
之原子某以翰林侍講余正安所述行實請予表其墓
予於緝熙有姻連之好誼不可辭按狀緝熙之先居湖

廣之興國州世業儒曾祖彥文祖仁傑皆隱德弗耀元季其父明善號誠齋者以避地移居豫章之奉新遂為奉新人緝熙生於甲辰六月十二日自幼岐嶷不羣性識穎敏有志於問學誠齋屢迎師訓誨之及長復從教諭張克靜學書經得其指歸才譽日振洪武中被薦為邑庠訓導謁選於京師適有詔選儒者教武臣子弟吏部乃以緝熙等十人應命未幾擢靖江王府教授尋以外艱去職歲壬午復選入中秘與修太祖高皇帝實錄

永樂初書成蒙賜白金文綺襲衣陞國子學正丙戌三月朔上幸太學舍菜禮成御筵命講宴賚師儒緝熙亦獲與焉時人以為榮永樂戊戌秩滿陞國子監丞莅事公勤惓惓以經理學舍為務以勸懲淑慝為心故能贊輔司業貝公宗魯及與六堂師儒協恭和衷嚴申學規激勵後進於是諸生數千人肅然敬服莫不以緝熙為能盡職也嗚呼緝熙始為學正時生徒不過數十人其中成德達材者居多及處是任尤能切切誘掖獎勵以

致擢魏科登顯仕者率自太學出由是聲聞益著而作
興之功賢於前人遠矣自非際遇昭代得以行其志又
孰能知緝熙之才之賢若是乎嘗自以行已率直號曰
憇叟故名其所為詩文曰憇叟藁凡若干卷藏于家享
年六十娶同邑王氏初未有子以外姪戴氏子興胤為
後尋側室楊氏生子三人興閣赦生臘生女一人巽順
嫡生同邑廖子彤其婿也予以緝熙平生志節有足書
者其沒也烏可泯故撫其槩表諸墓以告來者

陳處士墓表

三山陳處士之沒也今已四十有一年其諸孫翰林修撰曰振字叔剛者始奉前真定某縣教諭劉彥行所述行實來請文將勒之墓石用垂不朽叔剛秀敏而質實由進士釋褐拜監察御史與修兩朝實錄遂陞今官夙夜恪勤篤學勵行孜孜焉志於遠大思有以顯揚其祖考蓋可尚已予因告之曰昔歐陽公有云非敢緩也蓋有待也由此觀之抑何汲汲於表先墓哉叔剛泣且拜

曰敢不敬承先生之訓然有父命不得文以慰先祖之靈吾父之哀痛何由而釋哉予於是弗克辭既閱其狀則知處士之為篤行君子孝於其親友於兄弟厚於姻族而仁於里閭嘗有族人困於賦役盡鬻其產業而出居外境者處士力勸其還割已田構室廬以居之有女子孤幼無依者收養而婚嫁之墳塋無主後與子孫貧乏弗克展祀者歲時為祭掃如禮尤樂於施予見貧不能自存者解衣推食惟恐後人有所貸而弗克償者未

嘗以為言其居親喪哀毀成疾至除服矐然若不勝見者憐之其奉親祀先必豐以脩其治家政必嚴以肅子弟能循蹈規矩留心問學者則獎勸之其輕躁浮靡棄本逐末者則戒飭之必使率德改行而後已鄉人皆以處士質直而尚義凡忿爭者不之有司唯得處士一言則莫不敬服而去自非篤行之君子疇克爾耶處士諱鈺字伯榮其先世與古靈先生襄皆出於太尉檄太尉自光州固始從王氏入閩生三子長令鎔居閩邑之大

義次令圖令猷居侯官之古靈裏即令圖曾孫也大義之族寔蕃散居吳浙間宋時登科第列膺仕者纒纒弗乏淳祐中顯謨閣待制湖南安撫使愷自嘉興歸卽閩郡建榮繡坊于大義此其顯者也處士之曾大父諱某嘗任某副使官故鄉大父謀大父諱某皆隱德弗耀母周氏昆仲五人處士第三初娶福清周氏性柔順而精於女紅先處士十七年卒實洪武乙卯十二月戊子也生元至正丁亥四月庚子享年二十有九繼同邑黃氏

慈愛出於天性溫淑本於自然其子男週女盈適張頤
皆周氏出也黃氏撫之如己生孫男四人振杪振柶女
二曾孫男煒燦女二淑源處士生元至正乙酉十二月
癸酉卒洪武辛未九月乙巳享年四十有七以明年某
月某日與配周氏合窆于藍利山黃氏生元至正乙酉
八月庚午卒永樂甲辰九月乙卯享年八十以是年十
二月庚申祔于處士之墓嗚呼處士之德善固不待表
暴而自能顯著於世然孝子之心尤惓惓於此者亦常

情之所同也况處士復有賢孫如根者方進用于時其所以顯揚先德者蓋未艾也予故撫其平生大槩以表於其墓尚有俟於異日焉

龔思齊墓表

崑山有篤善之士龔思齊以宣德癸丑五月己巳卒於家其子理中今年禮部會試乙榜冠帶讀書太學聞訃將歸匍匐涕泣請於予曰理父少有抱負以家務乏人經理母老在堂當謹侍奉故弗獲仕以展其所蘊乃延

師篤意教理兄弟將冀其成人理兄弟不肖未克顯揚而吾父竟歿哀痛奚堪已丐詹事府少詹事兼翰林侍讀學士泰和王公為墓銘敢復求先生之文以表于墓庶幾慰吾父於地下且少逭理兄弟不孝之罪也予傷其志弗忍辭按狀思齊諱賢先世居汴有號遇仙者隨宋南渡至崑山乃折銀杏一枝插地祝曰此枝若生吾於是居其枝果生遂家焉越七世有諱端甫者思齊之高祖也諱天祐者其曾祖也諱士斌諱子瑞其祖與考

也連世隱德弗耀母姚氏有淑行思齊生而穎敏幼知
務學甫成童父祖相繼沒克自樹立事母甚孝既長從
鄉先生講習聞見日博操行益堅理其家舉有條緒待
族黨禮姍親處賓朋謹於禮節邑里推重之遂舉為糧
長以董一區賦稅思齊存心公恕不驅迫以厲其下人
不知勞而賦無逋負鄉人有疑事必往咨詢無不裁置
得宜有爭訟多不之官惟求思齊一言以決方春播種
聞農家種子弗給及艱於食者傾其家所藏以濟之弗

足復為假貸以足之歲旱作桔槔分置與人取水灌田
弗取其傭人有喪弗克舉者則市棺以給之嫁娶過期
者則出貲以為助人多蒙其惠利焉其歿也無賢愚老
少咸悼惜之奔走哭弔者相望於道生洪武丙寅十二
月辛丑得年四十有八以某年月日葬里中駟馬涇先
塋之次娶周氏子男三長珩次即理又次琚女一未適
人孫男一慶同女三皆幼嗚呼思齊存心忠厚才足幹
濟惜乎壽年弗永未弘其施然有子克成厥志駸駸乎

立身將顯融於時所以垂聲振耀而昌大其家者蓋可待也故為叙次其事行俾表于墓道焉

贈嘉議大夫工部右侍郎周公墓表

宣德六年秋九月癸未封奉議大夫越府右長史吉水周公秉昂卒於家其子忱時為工部右侍郎奉命巡撫南直隸諸郡得訃奔歸聖天子聞之遣使諭祭且詔忱起復視事明年四月丁酉葬邑之仙獅石南與其先室龍氏合窆焉又明年朝廷推恩贈嘉議大夫工部右侍

郎忱惟墓石未立無以彰先德侈君恩乃屬其友禮部
侍郎章尚文述公行實請少傅西昌楊公為銘納諸壙
復徵予文表墓道予素知忱父子之賢弗可辭公諱森
秉昂其字也其先會稽人世次顯晦徙遷不常自敷文
閣學士友賢生兩浙宣撫汝翼汝翼生瑞州知府應合
應合生天驥元吉州路總管始徙廬陵天驥五子長至
道橫州路治中公之高祖也曾大父諱圭忠州判官大
父諱鑑南康路知事考諱潤隱德弗耀號遺安先生元

季徙吉水之月岡今為吉水人母李氏賢明知書史以遺安公四十未有子脫簪珥勸納黃氏女而生公自幼穎敏好學言動不妄甫成童克任家政既長學識益充有司屢薦其才行以親老辭奉母李甚謹李嘗有疾躬奉湯藥衣巾不脫者累日既歿哀毀踰禮每念所生母早歿言及必流涕重以葬地卑濕卜遷之欲啓壙奉柩於家或言不利公毅然曰事死如事生奚不利之有竟舁置中堂設奠三日而後葬寡姊喪其諸子不在側乃

捐已貲為治喪葬如禮妻母久歿未葬輒以已地畀之或
謂此地主貴富公曰惟義所適豈希利耶待宗戚接賓
朋恩義藹然人或有过面加規正有患難曲為拯救胥
吏培斂者不敢入公之里無賴相誘為盜者悉遵誠約
而悔過里中嘗有犯偽鈔者誣及平人公言於官明其
枉而出之嘗客淮西同行遇盜欲誣舟人公力言不可
既而盜果獲平居以氣誼自高慕古人竒節偉行厭士
俗之庸庸碌碌者談世務論人品一協於至公舉事必

精思深慮急義而輕利族黨有訟惟公一言而決人皆謂公忠厚長者尤惓惓教諸子延師購書不吝所費以忱聰敏遣入郡庠受經夙夜親加督勵忱以永樂甲申進士入翰林為庶吉士擢秋官主事陞越府右長史拜今官公嘗兩就養於京師誠勉切至以故忱益知自勵遠大之福方及於公而公不待也可勝悼哉公生乙巳四月戊戌至是享年六十有七配龍氏贈淑人元義兵叅軍復皋次女婦道母儀著稱族里先二十七年卒繼

室胡氏封太淑人亦賢而克相子男四長即忱次恂次
恪先卒次怡女二蘭貞蕙貞陳行恭蕭肇成其婿也孫
男八人英芾節著芳蘭莊茂女八人曾孫男五女四鳴
呼連處士應山一布衣以積德行善致二子舉進士為
邑令其歿也應山之人至於今思之弗忘公明敏惇實
孝行著於家信義孚於鄉身雖弗試而能成其子顯庸
於朝薦膺恩命存歿光榮其過連處士遠矣是用述其
平生大槩俾勒石墓道以示後之人焉

奉議大夫衛府左長史金君用誠墓表

衛府左長史三衢金君以正統己未夏五月廿日卒於
官子純懼其才行聲實之懿久或湮泯無以昭示後人
謁予文表諸墓為之叙曰君諱實字用誠浙之三衢開
化人曾祖振之祖伯圖父德厚三世俱不仕母蘇氏君
自幼穎悟書過目成誦始從叔祖戶科給事中玉衡學
即知屏去浮靡專意經傳暨游邑庠甚為典教者稱賞
且以遠大期之歲壬午太宗皇帝入正大統詣闕獻書

以君德民政為之綱躬行仁義虛已納諫明察善斷審
於用人恭儉節用為君德之目厚風化尚廉耻省刑罰
薄賦稅愛民力為民政之目太宗嘉納其言復親策之
對稱上旨命入翰林與修太祖皇帝實錄書成賜以金
幣永樂紀元擢翰林典籍修永樂大典未幾特選為東
宮講官時仁宗皇帝在儲位恩眷累加丁亥以外艱去
服除陞左春坊司直郎日侍經筵講說詳明致有良佐
之褒辛卯丁母憂哀毀成疾閱十年始起任職仁宗登

極妙簡宮僚之賢者輔導諸王乃授衛府左長史階奉
議大夫誥贈其考如厥官妣為宜人是歲復召入西掖
纂述先正格言以脩顧問宣德丙午歸謁先塋恩賜優
厚拜奠既畢日召鄉黨宗戚相與燕樂以榮上賜既還
益以輔導為已任上深敬禮之今上皇帝嗣大寶郊祀
謁陵悉以命王左右之力居多戊午冬王薨哀感成疾
已未春為禮部會試同考官事竣上疏乞骸骨命下而
卒享年六十有九君天性至孝少遊學官以不得奉日

久歡朔望歸謁必奉觴上壽以悅親心父沒奉母宜人
娛養備至友愛季弟老而弗衰處鄉黨以誠信善則揚
之過則從容規之子弟好學者激勵而誘進之至於周
貧恤難不吝所有故人林文節卒於京親為殯斂歸其
遺骸太學生江表死無所託君既為治喪事閱其篋得
白金數十兩封識以歸其家其以義從事類如此居家
敦行節儉而甚孝友賓客過從輒命酒為歡談論竟日
亶亶忘倦閱經史日有程限或有事妨夜必補之不以

寒暑少廢故經史子書以及陰陽星歷醫卜老釋諸書悉能探其賾而究其非嘗曰人不能無非覺而改之斯善矣遂伯玉行年五十而知四十九年之非孔子嘗以君子稱之因以覺非名齋賦詩以自警有靜存動察兢兢自持之語為文章春容暢達理與氣俱詩則和平冲淡無雕琢之病有文集若干卷藏於家配汪氏封宜人子男三人長曰讓次即純已酉鄉貢士季曰絃女二人曰綺適方濬曰纓庶出也孫男十二人徙義養蒙俊童近

思克已弘訓象賢鵬停熙載允濟汝霖某孫女二人其
葬以某年某月某日其墓在某鄉某山之原嗚呼君之
學行自足以昭當時傳後世豈待表而見哉然孝子之
心自有所不能已者也故為之述其槩俾勒石於墓上
贈奉政大夫陝西按察司僉事林君墓表

林君仕紀既卒二十有六年是為宣德壬子朝廷以其子
時歷仕有能聲褒之誥命推恩贈君奉政大夫陝西按
察司僉事配余氏宜人又四年時自貴州按察副使入

觀間謁予泣告曰不幸先考妣早棄既合葬於邑之孝義里斗巖山之原重惟先德未著圖恩未彰為歎敢徵文以表於墓予與時同出閩中素相善弗可辭君諱憲字仕紀性至孝早失怙哀泣動人事母恭謹始終弗替尤惓惓務善人有犯者不與較貧而負貸者不責償居室為公廩所迫遂徙居於後埭創造一新於是祀先有堂教子有塾至於庖湍廩藏各有其所既深愜所志乃隱約不仕惟篤勵諸子讀書以紹先業既而遣時入郡

庠授經時能自奮勵登永樂乙未進士第累陞至今職
配即余氏宋朝請大夫授之裔淑慧儉勤事舅姑相夫
訓子俱協理道子男四長即時次麟先卒次鸞次鸞克
勤問學女二適宋適鄭皆名族也孫男九曰纘纘績紳
純絃縈某孫女三君生元至正丁亥三月辛酉卒永
樂丁亥十二月丙午得年六十有一君之先出自宋金
紫光祿大夫公悅始居莆城之朱紫坊三世府判公霽
析居望京門外五傳至貢士諱精裕者君之高祖也復

遷烏石山下曾祖蜚孫仕元學諭祖治考宗傳俱有隱德弗仕妣陳氏子三人君其季也嗚呼君先世之德之隆如此而君又能敦德好義以振其家聲如此且教其子底于有成致蒙褒贈之命光華賁於幽壤世豈多見哉是用書其事表之墓上以垂于不朽云

故國子司業吳君墓表

君子寓形天地間德足以師表于士類學有以兼通乎古今修諸已者有餘而見於用者或有未盡故其既歿

而哀傷追慕猶不能已於人者若予亡友國子司業吳君是也君諱溥字德潤別號古崖先世家臨川之種湖曾大父景南號南牕博學工文草廬吳文正公嘗序其南牕吟藁大父某號楚江隱德弗耀父思清贅崇仁章氏後遂為崇仁人君生元至正癸卯四月四日少遊於鄉先生前渭南令鄧伯恭門伯恭見而竒之謂思清曰是子噐宇不凡異日必能大公之門弱冠舉孝廉不就洪武丙寅邑大夫知其才賢乃舉邑庠子弟員從前進

士李原成治春秋文藻甚為原成稱賞家雖貧窘而志學不厭祁寒盛暑亦不少廢同輩有忌之而肆譏侮者恒不與校而所志益堅歲庚午領江西鄉薦以疾弗果會試尋丁外艱哀毀骨立幾至不起服闋假館學舍教授以自給衆亦易視之獨永豐羅博士師程時分教邑庠折節與交乙亥上京師以試期不及遂入為太學生嘗奉詔宣諭武臣使雲南卻其元戎文綺之贈又以閱士伍使福建一無毫髮之私人皆稱其廉介其所至過

古跡名勝輒賦詠紀之累至數百篇比還太學時太常
丞張顯宗攝祭酒事嚴毅方正於諸生中罕與可獨以
君為賢而為延譽於公卿大夫間歲庚辰試禮部第一
廷對賜進士出身擢翰林編修永樂初與修太祖高皇
帝實錄書成大沐恩賚陞修撰既又纂修永樂大典充
副總裁戊子用祭酒胡公若思薦陞國子司業居官以
禮自持以師道自任以勤率諸生每五鼓升堂講授終
日危坐無怠容諸生皆敬畏而心服焉仁宗皇帝在東

宮監國南京眷遇殊厚洪熙紀元首膺勅命進階承德
郎贈及考妣宣德丙午通政使陳璉奉命掌國子監事
九月三日設宴公堂君從容言笑如平時酒闌忽得風
疾昇歸私第以是夕卒享年六十有四臨終無一語及
身後事但屬治喪不用浮屠所著述有古崖藁若干卷
配鄭氏封安人子男四人與弼與疇與年與性女二人
長適應天府學教授孫曰謙次適豐城徐士英孫男三
孫女七諸子奉柩歸葬崇仁邑治北二十里之左稿既

葬十有三年與性以明經領薦至京泣而告曰先君子
務學篤行以古人自期而官止司業弗究所施年未及
古希不肖無似又不克致位通顯以光振先德惟先生
於先君子同年登第又同日擢官翰林知之悉者莫先
生若也表諸墓道傳示永久亦莫若先生宜也不肖敢
以請嗚呼君之孝友篤行出自天性清修苦節至老弗
替其為詩文詞暢理明足追古作者第以不媚當道官
太學幾二十年而不獲叙遷卒之日身無以為殮家無

以為喪子孫無以為衣食資而縉紳之流持乎公論者
莫不為之悼歎也然君之志雖不獲大伸於當時而能
使天下之人信君之德操者無間於貴賤傳誦君之文
章者無間於遐邇視彼之得志一時而泯沒於身後者
豈不相去遠矣哉况君之子若孫有志問學期乎顯榮
昌大以慰君於地下者又有可冀歟姑立表以俟云

故翰林修撰張君墓表

西江有清慎剛介君子曰張君伯頴者累官至翰林修

撰以疾卒於永樂癸卯十二月一日距今蓋十有六年
矣其子承翰以明經分教應天府庠乃奉學士錢君所
為序述事行謁予請言表諸墓道予昔在翰林素重君
為人乃不辭而次第之曰張氏為吉水文昌鄉右族累
世業儒而多望士曾祖震可號南礪博學工文祖道益
號道山元延祐中舉進士于鄉考安禮洪武初以經行
修明仕河南鄧州學正學者稱為後山先生君諱嗣祖
字伯穎母劉氏君以元至正辛卯十月八日生自幼眉

字秀朗屹出不羣書過目輒成誦嘗為寇掠去養為已
子久之出牧田間過者怪其異於常兒因就問之而得
其里居與所生之悉遂走報其父贖以重貲既歸教之
學閎悟絕人肆力群經而尤邃于書洪武甲子領江西
鄉薦明年會試禮部得乙榜授廣東陽山縣學教諭無
何以外艱去官服除調蕪湖所至以師道自任禮法自
持開導諸生曲折詳盡以是士多成材出而擢科取仕
者相繼永樂初以近臣薦擢翰林五經博士與修高廟

實錄書成遷檢討賜白金文綺襲衣未幾修永樂大典
充副總裁復膺楮幣之賚秩滿陞修撰時車駕幸北京
留署南京翰林院事嘗考應天府鄉試去取公明士論
服之晚得腫疾二子自鄉來省疾既少間亟遣歸報其
母不數月而劇致僚友之親厚者語之曰吾以一介下
士致身禁近死復何恨第上無以報國恩下不及見吾
兒為憾爾言訖神爽如平時是夕奄然而逝享年七十
有三君平生孝於親敬於兄信於朋友厚於宗族母嘗

卧疾躬侍湯藥不去左右衣不解帶者連旬既歿而毀
頰不勝宗姓子弟以先世田產質諸人而不能自贖者
捐貲為贖而畀之喜賓客過輒相與款洽然不嗜酒當
稠人大會中杯酌淋漓衆皆謹譁失次公則凝然中處
卒不為酒所亂為人長身山立鬚髯奮張見者為之改
容家居雖燕私必嚴以飭當溽暑而食不去巾服僅使
畏憚戶內肅然無譁後生輩疎蕩少檢者嘿讓不少貸
或與坐移時不交一談其莊敬自持者接以溫顏慰藉

以好語既去尤稱道之不置居官廉勤臨財錙銖不苟
取有官外郡而餽銀器者謂其所得非義峻辭却之出
入館閣二十年足未嘗履貴勢之門以希合幸進公退
終日清坐玩誦書史雖家用弗給一不經意為文嚴正
似其為人所著述有書題講說中庸析理苦澹齋集無
名翁傳通若干卷藏于家配杜氏劉氏子男三人介申
介甫杜出也介甫早卒承翰劉出也女三人皆適士族
曾直溫陳清渭劉景福其婿也孫男五人孫女五人初

君之卒承翰偕其兄奉柩歸葬於鄉某山之原嗚呼士君子立身制行既能有所自持而又加以問學之懿則其人歿猶不忘矣張君之行學固自足表著於世奚俟予言然以其子請之之勤故具述如右俾勒諸石而揭之于墓云

明封翰林編修文林郎裴君墓表

士君子奮用當世砥名礪行于平居無事之日固足重矣至其屢用屢退險夷一致者豈不尤足重歟觀之裴

君可見矣君諱璉字汝器荆之監利人曾大父興邦仕
宋為某郡守大父文達父伯衡俱有潛德母孟氏君幼
穎敏補郡庠生弱冠湘獻王見其秀偉舉動老成命署
邑東縣學事適靖江王道過與語器之俱載竟日賜詩
為別及補上舍為祭酒宋訥所稱嘗偕同舍六人徃西
涼計公廩比還太祖高皇帝問廩儲虧盈六人者莫能
悉俱被罪惟君疏其實以對獲免未幾擢知劔州高皇
帝諭以理民之道賜衣衾路費甫三載用薦陞浙江按

察僉事尋調江西永樂初坐事謫戍興州才四月驛召授監察御史四年陞河南按察副使坐事謫戍武清復用薦授監察御史已而丁母憂奪情起復時仁宗皇帝以皇太子監國知君賢陞左春坊中允為同列所連改大理評事繼遷刑部主事復坐事降易州同知仁宗踐阼念君舊在宮僚特陞工部右侍郎尋調北京刑部復坐事降知涪州宣德三年春入朝時其子綸官翰林編修君得循例就封致仕此其進退之槩也始知劔州即訪

民疾苦修舉百廢州民世以茶為利為王府權貴人所
侵君請禁戢之民獲利如初他州之政類如此其為御
史糾劾勢要不避艱危太宗皇帝嘗當朝獎諭河南皂
軍山寇發命公廉其事既還上方畧緝捕頃時寇平陝
之階文二州叛寇僭稱王號復命公按之公廉得其窟
穴諸渠魁俱就縛歸言其餘脅從者皆出於不得已悉
得從活居常以擊強植弱疏雪冤滯為念至於作興學
校獎進士子其為州為按察所歷皆然惟於劔於易於

江西久而彌著人至今稱之曩坐事去江西南昌守密
有厚贖一無所受其行事律已類如此性尤篤於孝思
伯衡翁不逮養言及必慟所得月俸量其日費悉以奉
母每遇生辰追悼不已人強之為壽輒避去平生藻思
奮發見諸詩文若柏庭訓子圖野舟集俱藏于家其生
以甲辰冬十月一日享年七十有二宣德乙卯春三月
十三日卒於家娶夏氏有婦德側室王氏子男四人長
經次即綸甲科第三今仕修撰次緇次純次女一人適池

鳳孫男七人衮震裳辰衷褰宸孫女五人以其年某月
某日祔葬邑之白湖東原祖塋綸奉翰林侍講劉永清
所述行狀徵予表其墓予嘗與君同僚且交舊義弗可
辭用書其槩俾刻諸石以示永久嗚呼君為人廉介不
阿歷官中外四十餘年所至有為雖屢坐事未嘗有私
過用是暫去即復而行益堅名益著及恬退晚節俱足
為世勸云

故山溪逸士周君墓表

周氏吉之右族衣纓圭組世裔踵接迄今數百餘年彌
久彌盛者豈無自而然蓋詩書以涵養之禮義以維持
之故生長高門而能躬布衣韋帶之行勵志問學而不
溺驕吝逸慾之樂宜江鄉所推尚而賢士大夫皆有取
焉若今山溪逸士諱道字時立者其一也逸士世居泥
田曾祖學顏祖孟秦俱博學不仕見稱於當時學士鉅
卿考公明號溪園任教官累典藩方文衡既卒少保金
公為銘其幽堂逸士承家學之懿兼有穎敏之資刻志

問學從祖台州同知仲芳君竒其少而有志遂授以經
弱冠出為鄉社弟子師大家爭延致之溪園君既出仕
逸士躬理家政奉賓祭待族姻咸中禮度每間歲省其
親不辭艱險至於事繼母撫諸弟尤克盡心從叔公智
公顯坐累謫戍鞠其幼子女為畢婚嫁里有素善者舉
家疫作人無敢往逸士獨旦暮往視之有死者則督僮
僕殯殮之故始遷之祖有祀田族大以繁久而湮沒今
翰林修撰功叙倡族人建祠割田以助春秋祭饗且修

譜以續世系逸士多力焉平生行已制事一由道義性尤
介直不能容人過而亦不肯自容其過鄉有爭辨而求
直者面拆其是非弗少貸人亦心服而無怨惡之者結
樓於重榮桂側藏書萬卷課子之餘日與賓客焚香鼓
琴酌酒賦詩臨風翫月悠然自適為文雄逸浩汗曲盡
物情而皆本於理有山溪集藏於家仲弟迪官翰林季
弟進司訓襄陽子源典教德清皆勗以飭身守官之道
誘掖宗族後進無間戚疏雅志恬淡不嗜仕進雖當宗

姓鼎盛登仕版者相望而獨韜光斂榮肆意丘壑可謂
篤行君子矣以正統丁巳六月十有四日卒得年五十
有五娶毛氏繼楊氏子男四人長即源由鄉貢士任德
清教諭以薦陞知天台縣事方嚮用未涯次沂潛澤皆
業儒女二人長適羅宗淵次在室孫男三人槃槃梁孫
女四人將以某年某月某日葬於某山之原源預以修
譔功叙所述事行謁予泣拜請表諸墓嗚呼世之大家
望族弗克綿延其慶祚者無詩書禮義以為之節約也

周氏累葉事儒業溪園君既以儒為世用而山溪逸士復能以其父之業訓諸子兄弟與其族人底於成材而篤夫詩書禮義使慶澤之流久而弗艾是大可嘉也為其子孫者能世守而躬踐之則周氏之昌大容有既乎宜為之表以勸後人

故嘉議大夫刑部右侍郎吳君墓表

天之福於人者厚人之得於天者全此世之希有而古今之所同羨者也自非其忠厚仁義之德充培養封植

之本固烏能壽富康寧享榮名保令終而得於天若是
之厚哉徵於故封嘉議大夫刑部右侍郎吳公可見矣
公諱朗字景亮別號菊莊世家建寧政和之豈弟坊曾
祖越祖義考以甫俱隱德弗耀妣魏氏公生元至正丙
戌某月某日自少惇厚端慎不事浮靡性嗜學而尤謹
言行事先奉親一於孝敬兄弟三人胥篤友愛晨興聚
處于堂講論經史以淑子姪其或有過必諄諄誨諭未
嘗疾言遽色二弟既去世諸姪以齒繁屢求分異乃俛

從之貲產令自擇取以厭其意至於處鄉黨待交遊必和必信弔喪問疾曲盡時宜性尤廓達好施予恤匱周貧恒恐弗及里有喪不能葬者捐地與之有鬻女以償其負金者即召其人止之而毀券晚置別業於邑南曰南莊中置琴書旁植花卉日與耆舊杖藜幅巾笑歌徜徉不厭不倦時呼童命酒悠然共酌意豁如也子廷用永樂甲申進士任戶科給事中仁宗皇帝嗣位擢刑部右侍郎洪熙紀元蒙恩賜誥封公贈公之父皆如廷用

職母暨配俱淑人宣德壬子盜竊公之金帶襲衣有司
猝欲遣人捕索公止之曰愧無德及人而以細故撓人
是重予之不德也願止勿捕人益服其雅量歲乙卯廷
用轉禮部左侍郎莅事南京正統丙辰得請歸省公時
壽九十有三步履言笑如壯者廷用年亦六十有七率
厥子婦奉觴稱壽錦衣華髮照耀高堂鄉邑莫不稱慕
嘆羨以為不可及也公亦喜甚謂廷用曰吾老矣每慮
弗及見爾今幸相見實出朝廷大恩爾宜亟往以圖報

於萬一勿吾念也是歲十一月二十六日卒訃聞遣官
賜祭命有司營葬以丁巳七月十八日窆于邑東瞿里
仰山之陽壙之所需宜大板石徧求弗可得乃以木代
之當啓土時穴傍忽得版石適足其用人皆以為公積
善之報嗚呼生榮死哀若公者可謂盛矣非得於天之
全者詎克然哉公初娶張氏繼邵氏男一即廷用張氏
出也女一適同邑李景穆孫男三文煇旒通孫女三予
於公為同郡於廷用相知深且久乃為表其墓曰昔蔡

端明亦閩人當貴盛之時二親享壽考康寧之福母夫
人後以九十二而終歐陽公乃謂世之為子者必以夫
人祝其親為父母者必以端明教其子今廷用之賢之
貴顯視端明為無異而公之五福具備視其親為有加
矣又烏知今之為子者不以公祝其親為父母者不以
廷用而望其子歟數百年間僅兩見其美詎可多得哉
是宜勒諸貞石使後之觀者又將有所考焉

文敏集卷二十